

戎政典

戎政典第一百四十六卷

兵略部彙考四十四

唐二

高祖武德四年五月秦王敗竇建德於虎牢王世充降九月夔州總管趙郡王孝恭敗蕭銑於荊州十一月杜伏威討李子通敗之子通降 按唐書高祖本紀武德二年二月丁卯王世充陷殷州陟州刺史李育德死之四月乙巳王世充廢越王侗自稱皇帝癸亥陷伊州執總管張善相六月王世充殺越王侗三年四月辛酉王世充陷鄧州總管雷四郎死之七月壬戌秦王討王世充四年四月齊王元吉及王世充戰於東都敗績行軍總管盧君諤死之五月壬戌秦王世民敗竇建德於虎牢執之戊辰王世充降七月甲子秦王世民俘王世充以獻丙寅竇建德伏誅九月夔州總管趙郡王孝恭率十二總管兵以討蕭銑十月敗蕭銑於荊州執之十一月庚寅李子通降丙申子通謀反伏誅 按太宗本紀武德三年七月討王世充敗之於北邨四年二月竇建德率兵十萬以援世充太宗敗建德于虎牢執之世充乃降六月凱旋 按王世充傳武德二年四月世充矯侗策禪位建元

開明國號鄭世充率衆東徇地至滑以兵臨黎陽時黎陽爲竇建德守故建德亦破世充軍殷州以報其役三年築練兵臺於伊闕守將羅士信豆盧達稍稍歸國世充顧下多背己乃峻誅暴禁以威之戶一人逃家無少長皆坐七月高祖詔秦王率兵攻之至新安屯保多下敗世充於慈澗城八月王陳兵青城宮世充悉精兵來拒隔澗言曰隋失其國天下分崩長安洛陽各有分地吾常自守不敢西顧熊穀二州在度內不取敦鄰好也今王遠涉吾地越三嶠饋糧千里勤師遠出將何求王曰四海之人皆承唐正朔獨公迷不復東都士民來請師陛下重違我是以來公若降富貴可保必拒我勉之無多言世充約割地不許潁州總管田瓚請舉山南二十五郡歸九月王君廓進拔轅轅地至管城河南州縣以次降定始竇建德與世充隙至是建德遣使結好并陳赴援意世充遣兄子琬內史令長孫安世報且乞師四年二月青城宮守將以宮降王進保之世充引兵出方諸門臨穀水以戰王陣北邨令屈突通步士五千踰水擊之兵接王以騎決戰世充排攢兵殊死鬪自辰及午乃潰俘斬八千人王傳城塹而守之世充糧且盡人相食至以水汨泥去礫取浮土糲米屑爲餅民病腫股弱相藉倚道上其尙書郎盧君業郭子高等皆餓死御史大夫鄭頴丐爲浮屠世充惡其言

殺之然氣竭但嬰城須建德之救五月王擒建德并獲王琬長孫安世俘示東都城下且遣安世入言敗狀世充惶惑將突圍出保襄漢謀於諸將皆不答遂率將吏降軍門王受之以屬吏陳兵入城發府庫賚將士其黃門侍郎薛德音以移檄慢逆崔弘丹造弩多傷士並誅之又收段達楊汪孟孝義單雄信楊公卿郭士衡郭什住董濬張童仁朱粲王德仁等斬洛渚上以世充歸長安高祖數其罪世充曰計臣罪不容誅但秦王許臣以不死乃赦爲庶人與其族徙於蜀將行爲羽林將軍獨孤修德所殺初修德父機嘗仕越王侗世充既篡謀歸唐爲所屠者也世充篡凡三年滅 按竇建德傳武德元年字文化及至魏縣建德謂其納言宋正本及德紹曰吾隋民也隋吾君也今化及殺之大逆不道乃吾讎欲爲天下誅之何如正本等曰大王奮布衣起漳南隋之列城莫不爭附者以能仗順扶義安四方也化及爲隋姻里倚之不疑今戕君而移其國仇不共天請鼓行執其罪建德善之卽引兵討化及連戰破之化及保聊城乃縱撞車機石四面乘城拔之建德入先謁蕭皇后語稱臣執宇文智及楊士覽元武達許弘仁孟景等召隋文武官共臨斬之梟首轅門囚化及并其子載以檻車至大陸縣斬之建德性約素不喜食肉飯脫粟加蔬具妻曹未嘗衣紈綺及爲王妾侍裁十

數每下城破敵寶並散賚將士至是得隋宮人尙千數悉放去其文武驍勇尙萬餘各聽所之乃以誅化及報越王侗封之夏王遂號大夏以隋黃門侍郎裴矩爲尙書右僕射兵部侍郎崔君肅爲侍中少府令何稠爲工部尙書餘隨才署職委以政事有願往關中及東都者恣聽不留仍給道里費以兵護出於境二年陷邢趙滄三州復陷冀州執刺史麴稜赦之復以爲刺史八月陷洛州據刺史袁子幹遂遷都焉更號萬春宮使人如灌津祠先墓置守冢三十家又遣使朝侗因與王世充結歡北聘突厥士馬益精雄俄而世充廢侗乃絕之始建天子旌旗出入警蹕書稱詔追諡隋煬帝爲閔帝以齊王暕子政道爲郕公義成公主在突厥遣使迎蕭后建德自將千餘騎送之并獻化及首末幾連突厥侵相州刺史呂珉死之進攻衛州執河北大使淮安王神通同安長公主黎陽守將李世勣釋之復使世勣守黎陽館王公主饋以客禮滑州刺史王軌爲奴所殺奴以首奔建德建德曰奴殺主大逆納之不可不賞賞逆則廢教將焉用爲命斬奴而返軌首滑人德之遂降齊濟二州亦降兗州賊徐圓朗聞風送款三年世勣自拔歸國吏白建德誅其父建德曰世勣唐臣不忘其主忠也父何罪釋不問高祖遣使修好建德卽以公主等歸京師嘗執趙州刺史張志昂邢州刺史陳

君賓大使張道源等將殺之國子祭酒凌敬諫曰夫犬吠非其主彼悉力堅守以窮就擒伏節士也
今殺之無以勸建德怒曰我傳其城猶不下勞費士旅何可赦敬曰王之大將高士興抗羅藝於易
南兵未交士興節降王以爲可乎建德悟卽釋之然其大將王伏寶數持兵功略在諸帥上或讒其
反建德殺之伏寶臨死呼曰我無罪王何信讒自刈右手乎後戰數不利九月建德自帥師圍幽
州爲羅藝所敗藝乘勝襲其營建德陣營中填塹而出敗藝衆進薄其城不能拔乃還濟陰賊孟海
公兵三萬據周橋城以掠河南建德自擊之會秦王伐東都其中書舍人劉斌獻說曰唐據關內鄭
王河南夏有冀方此鼎足相持勢也今唐悉兵臨鄭出入二年鄭人日感二國兵不解唐強鄭弱勢
必舉鄭鄭滅則大夏有齒寒之憂爲大王計莫若援鄭使鄭抗其內我攻其外唐之兵必卻唐卻而
鄭完然後徐觀其變鄭若可圖因而取之并二國兵乘唐師老長驅而西關中可達有也建德曰善
乃遣使聘世充與連和會世充亦自乞師卽令其臣李大師魏處繪來朝請解鄭圍秦王留之不答
四年建德克周橋塢海公留其將范願戍之悉發海公徐圓朗之衆并兵號三十萬救世充至滑州
世充行臺僕射韓弘開城納之建德進逼梁元管三州皆陷遂屯滎陽運糧汴河西上舟相屬不絕

壁成臯東原築營板渚遣使與世充約期又遣秦王以書三月王進據虎牢翌日以騎五百覘建德營設伏道側獨以數騎去賊營三里覺賊出騎追之王漸卻誘至伏所卒起奮擊賊騎驚引去追斬三百級獲其將殷秋石瓚乃報建德以書建德失二將又聞唐兵精得書猶豫頓六十日不敢西時世充弟世辯爲徐州行臺亦遣將郭士衡兵數千人從建德王遣王君廓以輕騎抄其饗執賊大將張清特建德懼人情攜駭其諸將又新破海公掠獲盈給日夜思歸凌敬說建德曰今唐以重兵圍東都守虎牢我若悉兵濟河取懷州河陽以重將戍之然後鳴鼓建旗踰太行入上黨傳檄旁郡進壺口以駭蒲津收河東地此上策也且有三利乘虛擣境師有萬全一也拓土得衆二也鄭圍自解三也建德將從之而王琬長孫安世日請兵西言必流涕又陰齎金帛啗諸將以撓其謀衆乃曰凌敬書生豈知戰建德乃謝曰今士心銳天贊我也師將大捷方用衆議不得如公言敬固爭建德怒命扶出其妻諫曰祭酒計甚善王盍用之夫自滏口道乘唐之虛連營漸進以取山北因招突厥西抄關中唐必還師自救鄭難紓矣今頓兵虎牢下徒自苦恐無功建德曰此非女子所知且鄭朝暮待吾來旣許之豈可見難而退且示天下不信五月建德自板渚出爲陣西薄汜南屬鵠山互二十

里鼓而前郭士衡爲游兵秦王登虎牢城望其軍按甲不戰曰賊起山東未嘗見大敵今度險士囂令不肅也逼城而陣有輕我心待其饑破之果矣日中建德士皆坐列渴爭飲意益怠王麾軍先登騎怒塵大漲乃率史大奈秦叔寶纏磨幟馳出賊陣後建德軍顧而驚遂大潰建德被重創竄牛口谷車騎將軍白士讓楊武威獲之傳而西斬長安市年四十九初其軍有謠曰豆入牛口勢不得久至是果敗建德妻與其左僕射齊善行以騎數百遁還洛州餘黨欲立其養子爲主善行曰夏王奄定河朔號爲威強今一出不復非天命有歸哉不如委心請命無爲塗炭生民也遂分府庫散給諸將士令各解去善行乃與右僕射裴矩行臺曹旦率官屬及建德妻奉山東地并傳國八璽來降建德起兵至滅凡六年 按尉遲敬德傳敬德隋朝散大夫劉武周亂以爲偏將與宋金剛南侵武德二年金剛敗奔突厥敬德合餘衆守介休王遣任城王道宗宇文士及諭之乃與尋相舉地降引爲右一府統軍從擊王世充會尋相叛諸將疑敬德且亂囚之王曰敬德若叛寧肯後尋相者邪釋之引見臥內曰丈夫意氣相許小嫌不足置胷中我中不以讒害良士因賜之金曰必欲去以爲汝資是日獵榆窠會世充自將兵數萬來戰單雄信者賊驍將也騎直趣王敬德躍馬大呼橫刺雄信墜

乃翼王出率兵還戰大敗之擒其將陳智略獲排稍兵六千王顧曰比衆人意公必叛我獨保無他何相報之速耶賜金銀一篋竇建德營板渚王命李勣等爲伏親挾弓令敬德執稍略其壘大呼致師建德兵出乃稍引却殺數十人衆益進伏發大破之時世充兄子琬使於建德乘隋帝廐馬鎧甲華整出入軍中以夸衆王望見問誰可取者敬德請與高甌生梁建方以三騎馳往禽琬引其馬以歸賊不敢動 按裴行恭傳行恭從討王世充戰邙山太宗欲嘗賊虛實以數十騎衝出陣後多所殺傷而限長堤與諸騎相失唯行恭從賊騎追及流矢著太宗馬行恭回射之發無虛鏃賊不敢前遂下拔箭以己馬進太宗步執長刀大呼導之斬數人突陣而還貞觀中詔斲石爲人馬像拔箭狀立昭陵闕前以旌其武功云 按羅士信傳張須陁爲李密所殺士信與裴仁基歸密署總管俾統所部討王世充身被重創見獲於世充世充愛其才厚遇之與同寢食後得密將邴元真等士信稍稍疏斥士信恥與伍率所部千餘人來降高祖拜陝州道行軍總管因謀世充士信行則先鋒反則殿有所獲悉散戲下有功者或脫衣解馬賜之士以故用命然持法嚴至親舊無少貸其下亦不甚附師次洛陽攻千金堡堡有惡言詢軍士信怒夜遣百人載嬰兒曉譟堡下若自東都出奔者旣而

陽悟曰非也此千金堡耳因散去堡兵開門追掠士信伏入屠之無類賊平授絳州總管封鄴國公
按李育德傳育德趙州人祖諤仕隋通州刺史爲名臣世富於財家僮百人天下亂乃私完械甲

嬰武陟城自保人多從之遂爲長劇賊來掠不能克隋亡與柳燮等歸李密私署總管密爲王世充
所破以郡來降卽拜陟州刺史兄厚德自賊所逃歸渡河復被執賊使招育德陽許之故兄不死賊
帥段大師令裨校以兵守厚德陰得其驩乃與州人賈慈行謀逐賊慈行夜登城呼曰唐兵登矣厚
德自獄中擁羣囚謀而出斬長史衆不敢動大師縋城走卽拜殷州刺史厚德省親留育德以守引
兵拔賊河內堡三十一所世充怒悉銳士攻之陷城猶力戰與三弟皆歿 按秦瓊傳瓊字叔寶以
字顯齊州歷城人始爲隋將來護兒帳內母喪護兒遣使襁弔之吏怪曰士卒死喪將軍未有所問
今獨弔叔寶何也護兒曰是子才而武志節完整豈久處卑賤耶俄從通守張須陁擊賊盧明月下
邳賊衆十餘萬須陁所統十之一堅壁未敢進糧盡欲引去須陁曰賊見兵却必悉衆追我得銳士
襲其營且有利誰爲吾行者衆莫對惟叔寶與羅士信奮然行乃分勁兵千人伏莽間須陁委營遁
明月悉兵追躡叔寶等馳叩賊營門閉不得入乃升樓拔賊旂幟殺數十人營中亂卽斬關納外兵

縱火焚三十餘屯。明月奔還，須陀回擊，大破之。又與孫宣雅戰海曲，光登以前後功擢建節尉。從須陀擊李密、滎陽，須陀死，率殘兵附裴仁基。仁基降密，密得叔寶大喜，以爲帳內驃騎，待之甚厚。密與宇文文化及戰，滎陽中矢墮，馬濱死，追兵至，獨叔寶捍衛得免。後歸至世充，署龍驤大將軍，與程鸛金計曰：「世充多詐，數與下呪誓，乃巫嫗非撥亂主也。」因約俱西走，策其馬謝世充曰：「自顧不能奉事，請從此辭。」賊不敢逼。於是來降高祖，傳事秦王。府王尤獎禮，從鎮長春宮，拜馬軍總管。按薛萬均傳：萬均本燉煌人，後徙京兆咸陽。父世雄，大業末爲涿郡太守。萬均與弟萬徹因客幽州，以材武爲羅藝所厚。善與藝歸款，高祖授萬均上柱國、永安郡公。竇建德帥衆十萬寇范陽，藝迎拒之。萬均曰：「衆寡不敵，宜以計勝。」卽教藝羸兵阻水以誘之。萬均自以精騎百人匿城左，建德師度水，邀半渡擊之，大敗其衆。明年建德以二十萬騎來攻，兵已緣堞，萬均與萬徹率死士百人出地道掩擊其背，衆驚潰去。按薛收傳：收字伯褒，蒲州汾陰人。隋內史侍郎道衡子也。出繼從父孺，年十二能屬文，以父不得死於隋，不肯仕。郡舉秀才，不應。聞高祖興遁入首陽山，將應義舉，通守堯君素覺之，迎置其母城中，收不得去。及君素東連王世充，遂挺身歸國。房元齡亟言之，秦王王召見，問方略，所對合旨，授

府主簿判陝東大行臺金部郎中是時方討世充軍事繁綜收爲書檄露布或馬上占辭該敏如素構初不竄定竇建德來援諸將爭言斂軍以觀賊形勢收獨曰不然世充據東都府庫盈衍其兵皆江淮選卒正苦乏食爾是以求戰不得爲我所持今建德身總衆以來必飛轂轉糧更相資哺兩賊連固則伊洛間勝負未可歲月定也不若勒諸將嚴兵締壘浚其溝防戒毋出兵大王親督精銳據成臯厲兵按甲邀建德路彼以疲老當吾堂堂之鋒一戰必舉不旬日二賊可縛致麾下矣王曰善遂擒建德降世充王入觀隋宮室且歎煬帝無道殫人力以事夸侈收進曰峻宇雕牆殷辛以亡土階茅茨唐堯以昌始皇興阿房而秦禍速文帝罷露臺而漢祚永後主曾不是察奢虐是矜死一夫之手爲後世笑何此之能保哉王重其言俄授天策府記室參軍按封倫傳倫字德彝秦王討王世充命倫參謀軍事時兵久不決帝欲班師王遣倫西見帝曰賊地雖多羈縻不相使所用命者洛陽耳計窮力屈死在旦夕今解而西則賊勢盤結後難以圖帝納之賊平帝謂侍臣曰始議東討時多沮解者唯秦王謂必克倫贊其行雖張華叶策晉武亦何以加於是封平原縣公判天策府司馬初竇建德援洛陽將趣虎牢倫與蕭瑀諫不可至是入賀王笑曰不用公言今日幸而捷豈智者干

慮或有失乎倫謝素不及 按蕭銑傳銑後梁宣帝曾孫也祖巖開皇初判隋降陳陳亡文帝誅之銑少貧傭書事母孝煬帝以外戚擢爲羅川令大業十三年岳州校尉董景珍雷世猛旅帥鄭文秀許元徹萬瓚徐德基郭華沔人張繡等謀反隋且推景珍爲王景珍曰吾素微雖假名號衆不厭羅川令故梁裔也寬仁大度有武皇遺風且吾聞帝王之興必有符命隋冠帶悉號起梁蕭氏中興象也今推之以應天順人不亦可乎乃遣人告銑銑卽報景珍書曰我先君昔事隋職貢無廢乃貪我土宇滅我宗祔我是以痛心疾首思刷厥恥今天誘乃衷公等降心將大復梁緒徼福於先帝吾敢不糾厲士衆以從公哉卽募兵數千揚言跡盜將以應景珍會潁州賊沈柳生寇縣銑出戰不利謂其下曰岳陽豪傑將推我爲主今天下叛隋吾能守節獨完哉且吾先人國於此若徇其請復梁祚因以半紙檄召羣盜誰敢不從衆悅乃以十月稱梁公旂幟服色悉用其舊柳生以衆歸銑用爲車騎大將軍不五日遠近爭附衆數萬乃趨巴陵景珍遣徐德基郭華率彊姓數百迎謁而先見柳生柳生與其下謀曰梁公起我最先附勳第一今岳陽兵衆而位多誰肯爲我下不如殺德基質其人挾梁王以進則吾誰先因殺德基詣中軍白銑銑驚曰今欲撥亂遽自相屠我不能爲若主矣步出

軍門柳生懼伏地請罪銑責宥之陳兵而進景珍曰德基倡義竭誠柳生擅殺之不誅無以爲政且凶賊與共處必爲亂銑因斬柳生於是築壇城南柴上帝自稱梁王有異鳥至建元爲鳳鳴義寧二年僭稱皇帝署百官一用梁故事追諡從父琮爲孝靖帝隋將張鎮州王仁壽擊銑不能克及隋亡乃與寧長真等率嶺南州縣降於銑時林士弘據江南銑遣將蘇胡兒拔豫章使楊道生取南郡張繡略定嶺表西至三峽南至交趾北拒漢水皆附屬勝兵四十萬武德元年徙都江陵復園廟引岑文本爲中書侍郎掌機密遣道生攻峽州刺史許紹擊破之士死過半三年高祖詔夔州總管趙郡王孝恭討之拔通開二州斬僞東平王閼提諸將擅兵橫恣銑恐浸不制乃陽議休兵營農以黜其權大司馬董景珍之弟爲將軍怨之謀作亂事泄被誅景珍方鎮長沙銑下書赦之召還江陵景珍懼遣使詣孝恭舉地降銑遣繡攻景珍景珍曰前年醢彭越往年殺韓信獨不見乎奈何相攻繡不答圍之景珍潰而走麾下殺之銑進繡爲尙書令繡恃功亦驕蹇銑又誅之銑性外寬內忌疾勝己者于是大臣舊將皆疑間多叛去銑不能禁由此愈弱四年詔孝恭與李靖率巴蜀兵順流下廬江王琰由襄陽道黔州刺史田世康出辰州道會兵圖銑僞將周法明以四州降卽詔爲黃州總管趨

夏口道攻安州克之僞將雷長穎以魯山降銑乃遣將文士弘拒孝恭戰清江口孝恭大破之獲鬪艦千艘拔宜昌當陽枝江松滋僞江州將蓋彥舉以城降孝恭靖直逼其都初銑放兵止留宿衛數千人及倉卒追集江嶺迴遠未及赴孝恭布長圍守之數日破其水城取樓船數千交州總管丘和長史高士廉司馬杜之松詣靖降銑度救不至謂其下曰天不祚梁乎待窮而下必害百姓今城未拔先出降可免亂諸人何患無君乃麾而令守陴者皆慟以大牢告于廟率官屬縋衰布幘詣軍門謝曰當死者銑爾百姓非罪也請無殺掠孝恭受之護送京師後數日救兵至且十餘萬知銑降乃送款銑至高祖讓之對曰隋失其麾英雄競逐銑無天命故爲陛下禽猶田橫南面豈負漢哉帝怒其不屈詔斬都市年三十九自僭國至滅凡五年 按河間元王孝恭傳蕭銑據江陵孝恭數進策圖銑帝嘉納進王趙郡以信州爲夔州乃大治舟艦肄水戰會李靖使江南孝恭倚其謀遂圖江陵盡召巴蜀首領子弟收用之外示引擢而內實質也俄進荆湘道總管統水陸十二軍發夷陵破銑二鎮縱戰艦放江中諸將曰得舟當濟吾用棄之反資賊奈何孝恭曰銑之境南際嶺左薄洞庭地險士衆若城未拔而援至我且有內外憂舟雖多何所用之今銑瀕江鎮戍見艫舫蔽江下必謂銑

已敗不卽進則兵覘候往返以引救期吾旣拔江陵矣已而救兵到巴陵見船疑不進銑內外阻絕遂降 按李靖傳蕭銑據江陵詔靖安輯從數童騎道金州會蠻賊鄧世洛兵數萬屯山谷間廬江王瑗討不勝靖爲瑗謀擊郤之進至峽州阻銑兵不得前帝謂逗留詔都督許紹斬靖紹爲請而免開州蠻冉肇則寇夔州趙郡王孝恭戰未利靖率兵八百破其屯要險設伏斬肇則俘禽五千帝謂左右曰使功不如使過靖果然靖遂陳圖銑十策有詔拜靖行軍總管兼攝孝恭行軍長史軍政一委焉武德四年八月大閱兵夔州時秋潦濤瀨漲惡銑以靖未能下不設備諸將亦請江平乃進靖曰兵機事以速爲神今士始集銑不及知若乘水傳壘是震霆不及塞耳有能倉卒召兵無以禦我此必禽也孝恭從之九月舟師叩夷陵銑將文士弘以卒數萬屯清江孝恭欲擊之靖曰不可士弘健將下皆勇士今新失荆門悉銳拒我此救敗之師不可當宜駐南岸待其氣衰乃取之孝恭不聽留靖守屯自往與戰大敗還賊委舟散掠靖視其亂縱兵擊破之取四百餘艘溺死者萬人卽率輕兵五千爲先鋒趨江陵薄城而營破其將楊君茂鄭文秀俘甲士四千孝恭軍繼進銑大懼檄召江南兵不及到明日降靖入其都號令靜嚴軍無私焉或請靖籍銑將拒戰者家貲以賞軍士靖曰王

者之兵弔人而取有罪彼其脅驅以來藉以拒師本非所情不容以叛逆比之今新定荆郢宜示寬大以慰衆心若降而籍之恐自荆而南堅城劇屯歐之死守非計之善也止不籍由是江漢列城爭下以功封永康縣公檢校荊州刺史乃度嶺至桂州分道招慰酋領馮盎等皆以子弟來謁南方悉定裁量款效承制補官得郡九十六戶六十餘萬詔書勞勉 按李子通傳子通沂州丞人少貧以漁獵爲生居其鄉見斑白負戴者必代之家有餘財則以贖人而喜報仇隋大業末長白山賊左才相自號博山公子通依之以武力雄其間鄉人有陷賊者子通專經護之方是時羣盜暴忍獨子通仁愛歸者遂多不半歲有徒萬人才相畏忌子通乃引衆度淮與杜伏威合爲隋將來整所破奔海陵得衆二萬自稱將軍大業十一年僭號楚王宇文化及弑煬帝以右禦衛將軍陳稜爲江都太守已而稜降高祖授以總管卽守其郡子通攻稜稜窮乞師於沈法興杜伏威伏威自將屯清流法興遣子綸屯揚子間數十里子通納言毛文深請募吳人詐爲法興兵夜襲伏威二人遂交惡無敢先戰者子通得悉力取江都遂據之稜奔而免子通僭卽皇帝位國號吳建元明政齊賊樂伯通先爲化及守丹陽卽以衆萬餘降之子通用爲尙書左僕射又敗法興兵遂取晉陵以法興所署掾李百